

Pokopoko ku Polis

Siman pasá un tragedia a sagudí nos isla pasífiko. Pa motibu di bala ku polis a lòs durante karnaval, un persona a keda heridá i un otro a muri. Na momentu ku nos ta skirbi, e detayenan di e insidente tristu te ainda no a Sali na kla. Nos no sa si e tiro mortal tabata aksidental òf intenshonal; nos no sa si e polis a usa demasiado forsa òf si el a aktua ku tur su rason.

Un kos si ku ta sigur ta ku tin hopi diferente opinion i komentario en kuantu di e suseso aki. Algun ta afirmá ku e tragedia ta okashoná pa e tipo di pistol ku polis ta usa. Otronan ta mes sigur ku e víktimanan di e tiro teo ta kulpabel; ta nan mes a buska problema ku polis. Un otro vershon ta mustra ku e mesun siguridat ku e polis ta burdugu, i asta algun tabata kla pa kometé aktonan di violensia òf baha nan rabia riba e ofisial di polis.

Prome ku nos pèrdè kabes, ta bon pa nos bira na e páginanan di Skritura santu i mira kiko Dios ta bisa tokante polis. Romanonan 13:1-8 ta papia di tantu esnan ku ta traha lei (gobnantenan) komo esnan ku ta soru ku e suidananan ta kumpli ku lei (polis).

Dios ta bisa "tur alma sea sometí na e podernan superior ku ta poní riba nan" es ta nos outoridatnan gubernamental i polisial (13:1). Esaki no ta laga ningun hende afó. Kisas den bo opinion Beibel tin rason ora hustisia ta reina, ma segun bo, den e kaso aki, polis ta kulpabel. Sin duda esnan ku outoridat sa faya. Nan ta hende, i hende sa kiboka, hasi fout òf eror. Nos no sa si esei tabata e kaso, ma asta si polis a faya, esei no ta duna nos motibu pa rebeldiá kontra nos outoridatnan. Ta bon pa kòrda ku tempu ku e apotel Pablo a skirbi palabranan aki tabata tempu di e impero romano, i e emperadónan tabata inhustu, korupto, burdugu. Pablo a skirbi esaki di e outoridatnan ku despues a mat'é!

Dikon nos mester someté? "Pasobra no tin ningun poder sino di Dios; i e podernan ku ta eksistí ta ordená di Dios" (13:1). Dios ta Esun ku a duna nos outoridatnan e puesto ku nan tin. Pesei "esun ku lamta kontra e poder, ta rebeldiá kontra òrdu di Dios; i esnan ku rebeldiá lo trese kondensashon riba nan mes" (13:2). Hende, emoshoná, kayente pa aktua, tabata kla pa tuma lei den nan propio man na lugar di permití e prosedura legal sigui su kurso. Algun tabata kla pa tuma vengansa kontra esun ku a lòs e tiro. Kuidou! Si bo hasi esei, bo ta buska guera ku Dios, Esun ku a duna polis nan outoridat. Ken por bringa ku Dios i sali ganá?

Beibel asta ta yama polis "minister di Dios" (13:4). E palabra "minister" ta nifiká sirbidor. Nos ta yama un persona ku un sierto puesto den gobierno un "minister" i nos ta duna respèt na hende ku e titulo ei. Di mesun manera, nos mester respetá nos polis. Nan tambe ta "minister di Dios." Ta ken ta vigilá den bo barío ora bo ta drumi dushi di bo riba bo kama madrugá? Ken ta pone nan bida na peliger pa sigurá ku bo por biba trankil? Ken ta intermediá ora bo tin problema ku bo no por resolvé? Ta e "ministernan di Dios," polis. Nos mester respetá i apresia nan.

Polis, Dios Su sirbidor i representante, tei pa rekompensá esnan ku ta hasi bon i pa kastigá e malechor (segun 13:3). "Si bo hasi malu, warda bo kurpa; pasobra no ta pornada e ta karga spada; pasobra e ta minister di Dios, un vengadó (pa kastigá) esun ku ta hasi malu" (13:4). Dios a outorisa polis pa karga arma pa mantené ordu. Tempu ku Beibel a wòrdu skirbí, polis tabata armá ku spada. Awendia polis ta kana ku pistol. E pistol di polis no ta pa prònk. E menasa di usa e arma òf e uso mes di dje ta enfatisá outoridat di e polis. Si polis no tabatin pèrmit pa usa nan arma, nos komunidat lo tabata un lugar muchu mas insigur pa biba.

E investigashon di e tragedia di karnaval no a kaba ainda. Ma tantu promé ku e kaso ta finalisá komo despues ku nos tende e resultado, nos mester mantené nos kabes friu i respetá polis. Nan ta "ministernan di Dios."